

Nördernee – neet mehr mien Insel

Vandaag is de eerste Feriendag in Niedersachsen. Ok up Nördernee fangen vandaag de Ferien an. Sömmertied, Urlaubsluun.

Man dit Jahr is dat för mi all en bietje anners as anners. De Saken sünd packt. De Kuffers stahn paraat. Urlaub? Kien Urlaub. Wi trecken um. Wi trecken weg van Nördernee. As Familie mit twee lüttje Kinner.

Van nu an sallen wi weer up dat Fastland leven. Mien Mann hett al Arbeit in dat allermooiste Dörp van de hele Krümmhörn un is nu siet Maanten Wekenenpendler. He is düchtig blied mit sien neje Arbeit – un dat is vööl weert!

KOLUMNE

Moin, Moin
Schrievers moje
allerbest hoop
Pläseer **Spraak** vertellsel
Smüstern

Platt maakt

Van Augustmaant an hebb ik denn ok Arbeit in een van de grote Steden in Oostfreesland. An en besünner School, de för Plattdütsk uttekent is un vööl mit Platt arbeidt. Daar frei ik mi nu ok al düchtig up.

Man ik bün ok trüurig, dat ik de Insel nu verlaten doo.



Antje Lübber gehört zum Team der Autoren, die für die OZ die plattdeutsche Kolumne „Platt maakt“ schreiben.

Klaar hebb ik mi dat so mit mien Mann sülvst utsöcht, man acht Jahr Nördernee sünd en lang Tied. Mien Mann hett sogar 18 Jahr up Nördernee west.

Wi hebben uns hier kennenleert. Wi hebben hier vööl sehn, vööl beleevt un hier en good Leven hatt. Mien leve Frünnen, mien wunnerbaar Kollegen, so vööl besünner Minsken, de Kinner an d' School, de Karkenvörstand, de Strand, dat Meer un de ewigsmooi Natuur hier sall ik düchtig missen. Ja, ik bün trüurig un mien Hart un mien Kopp

seggen upstünds faken neet datsülvige. Well maal up en Insel leevt hett, de kennt seker dat Gefühl.

Woso wi weggahn? Dat is neet in een Satz to seggen. Daar bruuk ik mehr Riegen för. De Wohnrümte is en Thema. Wohnens sünd hier stuur to finnen – un noch stuurder to betahlen. Mit twee lüttje Kinner will en villicht ok geern en lüttje Tuun hebben. Eenfach de Döör opendoon un de Kinner na buten laten.

Dat is hier för de meeste Familien up Nördernee al maal neet mögelk. In Corona-Tieden mit Lockdown, sloten Kinnergaarns un Co. is en Tuun en besünners fein Saak.

Ok mag ik bi de Drogeriemarkt of bi de Koopmann neet alltied en Stünn anstahn. Klaar, de Glabottges ut Gladbeck, Bottrop, Gelsenkirchen maken hier Urlaub, de hebben Tied. Man dat gifft hier ok Minsken, de up dit Eiland leven un arbeiden.

De mutten sük an Terminen hollen. De sünd neet alltied in Partyluun un neet alltied in de Gieren-un-Fieren-Modus.

Ok heel belangriek: Uns hele Familie leevt in de Nörder Kuntrei un de Leerder Kuntrei. Wenn wi weer up dat Fastland sünd, können wi hör all vööl faker un ok maal spontaan sehn. Daar frei ik mi al up.